

**Dr Nikolina Poletan**

**Dr Branka Milošević**

## **POREMEĆAJI ACIDOBAZNOG STATUSA I NJIHOVA KOREKCIJA**


### **1. UVOD**

Za održavanje homeostaze organizma neophodno je između ostalog i održavanje koncentracije  $H^+$  jona u ekstracelularnoj tečnosti u usko određenim granicama. Poremećaj koncentracije  $H^+$  jona u kliničkoj praksi su veoma česti te poznavanje patofiziologije ovih poremećaja i njihove korekcije je nužno za svakog kliničara.

Međutim, iz praktičnih razloga ne koristimo pojam koncentracije  $H^+$  jona već pojam pH koji predstavlja negativni logaritam koncentracije  $H^+$  jona.

Acido-bazno stanje je definisano odnosima pH, bikarbonata i  $pCO_2$  što je prikazano Henderson-Hasselbalchovom jednačinom:  $pH = pK + \log \frac{HCO_3^-}{CO_2}$

pri čemu bikarbonat predstavlja metaboličku,  $pCO_2$  respiratornu komponentu acido-baznog stanja.




Slika 1: Regulacija acidobaznog stanja preko pluća i bubrega.

pH ekstracelularne tečnosti se kreće u rasponu 7,35-7,45, dok se intracelularni pH fiziološki kreće u granicama od 6,0-7,4. Poremećaj kad je koncentracija  $H^+$  jona povećana, tj kad je pH snižen naziva se acidoza; a kad je koncentracija  $H^+$  jona smanjena tj kad je pH povišen naziva se alkaloza. U regulaciji koncentracije  $H^+$  jona, tj pH učestvuju sljedeći regulacioni mehanizmi:

1.Puferski sistemi tjelesnih tečnosti i tkiva

2.Pluća

3.Bubrezi (1, 4, 5).



Slika 2: Odnos  $pCO_2$ ,  $HCO_3^-$  i pH.

## **2. PUFERSKI SISTEMI TJELESNIH TEČNOSTI I TKIVA**

Puferski sistemi su smjese slabih kiselina i njihovih soli, tj slabih baza i njihovih soli, što znači da imaju sposobnost da lako otpuštaju i vezuju H<sup>+</sup> jone.

1. Bikarbonatni puferski sistem ( brzo djeluje ali ima mali kapacitet i nije snažan; ovaj puffer se može kontrolisati bubrezima i plućima       $H^+ + HCO_3^- \rightarrow H_2CO_3 \rightarrow H_2O + CO_2$ )
2. Fosfatni puferski sistem (brzo djeluje i ima mali kapacitet)
3. Proteinski puferski sistem (proteini plazme, hemoglobin)

Puferski sistemi su distribuisani u krv, intracelularnu i ekstracelularnu tečnost. Puferski sistemi prisutni u krvi su bikarbonatni, proteini plazme te hemoglobinski i fosfatni puferi koji su smješteni u eritrocitu. U ekstracelularnoj tečnosti je prisutan bikarbonatni pufer. Intracelularni puferski sistemi su fosfatni i proteinski. (4)

### **REGULACIJA ACIDO-BAZNOG STATUSA PREKO RESPIRATORNOG SISTEMA:**

Disanjem se reguliše respiratorna komponenta acidobaznog stanja-CO<sub>2</sub>.

Respiratori centar je veoma osjetljiv na kolebanja pO<sub>2</sub>, pCO<sub>2</sub> i pH. Parcijalni pritisak pCO<sub>2</sub> direktno djeluju na respiratori centar ali i djeluje i preko perifernih receptora (porast pCO<sub>2</sub> stimuliše disanje pa će povećana alveolarna ventilacija sniziti pCO<sub>2</sub> do normalnih vrijednosti dok smanjenje pCO<sub>2</sub> inhibiše disajne centre te se hipoventilacijom zadržava CO<sub>2</sub>).

Hipoksemija djeluje indirektno preko hemoreceptora u karotidnom tјelu i luku aorte. (1, 2)

Kolebanja pH snažno djeluju respiratori centar- acidoza snažno stimuliše disanje dok alkaloza inhibiše respiratori centar.

### **BUBREŽNA REGULACIJA ACIDO-BAZNOG STATUSA:**

Putem bubrega se acido-bazni status reguliše sporije, tokom više sati ili dana, i ova kompenzacija je uglavnom kompletna. Na ovaj način se reguliše nivo neisparljivih (nevolutilnih) kiselina regulacijom koncentracije bikarbonata u krvi koji predstavlja metaboličku komponentu acido-baznog stanja. Reapsorpcija bikarbonata se odvija u proksimalnim i distalnim bubrežnim tubulima, a protoni se sekretuju. (3)

### **3. ISPITIVANJE ACIDOBAZNOG STATUSA**

Acidobazni status, zajedno sa gasnim analizama ispitujemo u uzorku arterijske ili kapilarne krvi.

Uzorak kapilarne krvi uzimamo iz jagodice prstiju ili iz resica ušne školjke.

Uzorak arterijski krvi uzimamo najčešće iz a. radialis, a.brachialis i a.femoralis.

Uzimanje kapilarne krvi je komfornije i bezbjednije, ali je najprecizniji nalaz dobijen iz arterijske krvi.

Parametri koje pratimo su: pH, pCO<sub>2</sub>, pO<sub>2</sub>, SO<sub>2</sub>, ABE, HCO<sub>3</sub><sup>-</sup>.

Većina uređaja omogućava i određivanje glukoze u krvi i elektrolita, ali su nam gore pobrojani parametri najznačajniji.

**pH:** Predstavlja negativan algoritam koncentracije vodonikovih jona. Referentne vrijednosti u ekstracelularnoj tečnosti iznose 7,35-7,45. Ukoliko je vrijednost <7,35 riječ je o acidozi, a ukoliko je pH >7,45 riječ je o alkalozu. Acidozu i alkalozu stepenujemo prema vrijednostima:

laka acidoza pH=7,35-7,30

teška acidoza pH=7,30-7,10

veoma teška acidoza pH<7,10

laka alkalozu pH=7,45-7,50

teška alkalozu pH=7,50-7,55

veoma teška alkalozu pH>7,55. (1)

**pCO<sub>2</sub>:** Predstavlja parcijalni pritisak ugljen-dioksida u krvi i najsenzitivniji je indikator adekvatnosti plućne ventilacije tj plućne funkcije. Smanjenje pCO<sub>2</sub> naziva se hipokapnija i ukazuje na hiperventilaciju, dok se povećanje pCO<sub>2</sub> naziva se hiperkapnija i ukazuje na hipoventilaciju. pCO<sub>2</sub> ima uske granice referentnih vrijednosti koje se kreću  $5,3 \pm 0,6$  kPa (40 mm Hg  $\pm$  5 mm Hg).

Laka hiperkapnija pCO<sub>2</sub>=6,06-6,65 kPa (45-50 mm Hg)

Srednje teška hiperkapnija pCO<sub>2</sub>=6,66-7,32 kPa (50-55 mm Hg)

Teška hiperekspansija pCO<sub>2</sub>=7,33-8,5 kPa (55-64 mm Hg)

Veoma teška hiperkapnija pCO<sub>2</sub>>8,5 kPa (>64 mm Hg) (1, 2, 3, 5)

**pO<sub>2</sub>:** Predstavlja parcijalni pritisak kiseonika u krvi i indikator je adekvatnosti razmjene gasova. Kiseonik se u arterijskoj krvi prenosi u dva oblika: kao rastvoren i kao vezan za hemoglobin eritrocita (najveći dio). Snižene vrijednosti pO<sub>2</sub> u krvi se nazivaju hipoksemija. Pojam hipoksemija ne treba zamjeniti sa pojmom hipoksija koji predstavlja smanjenu koncentraciju kiseonika u tkivima.

Referentna vrijednost pO<sub>2</sub>=9,3-13,3 kPa (70-100 mm Hg)


Laka hipoksemija  $pO_2=7,3\text{-}9,2$  kPa (55-70 mm Hg)

Teška hipoksemija  $pO_2=5,3\text{-}7,2$  kPa (40-55 mm Hg)

Veoma teška hipoksemija  $pO_2<5,3$  kPa (<40 mm Hg). (1, 2, 3, 5)

**SO<sub>2</sub>:** Predstavlja saturaciju tj procenat oksihemoglobina u odnosu na ukupni hemoglobin.

Odnos saturacije i parcijalnog pritiska kiseonika se najbolje prikazuje sa tzv krivuljom disocijacije hemoglobina. (1, 2, 3, 5)



Slika 3: Krivulja disocijacije oksihemoglobina.

Sa porastom  $pO_2$  raste i  $SO_2$  ali do određene granice tj kada krivulja postane horizontalna; to znači da je hemoglobin većim dijelom zasićen kiseonikom te da dalje povećavanje parcijalnog pritiska kiseonika nema značajnijeg uticaja na dalji porast saturacije hemoglobina. Iz krivulje se vidi da ako je  $pO_2 1,33\text{-}5,3$  kPa (10-40 mm Hg) tada se kiseonik lako oslobađa od hemoglobina jer male promjene  $pO_2$  dovode do značajnije promjene  $SO_2$  (strmi dio krivulje). Hemoglobin će imati manji afinitet za kiseonik tj lakše otpušta vezani kiseonik u tkiva kada se snižava pH i kada raste vrijednost  $pCO_2$ -pomak krivulje ulijevo.

Pomak krivulje ulijevo pri nižem pH se naziva Bohr-ov efekat, a pomak krivulje ulijevo pri porastu  $pCO_2$  se naziva Haldane-ov efekat (i tada hemoglobin ima veći afinitet za transport  $CO_2$ ).


**ABE:** Ili acido-bazni eksces predstavlja razliku u koncentraciji ukupnih baza i kiselina u organizmu tj predstavlja onu količinu kiseline ili baze koja je potrebna da se doda u krv da bi se pH vratio u referentnu vrijednost. Referentna vrijednost za ABE iznosi -2 do +2. Ukoliko je bazni ekces negativniji (<-2) to znači da je višak kiselina u organizmu tj u pitanju je acidoza, a ukoliko je >+2 znači da je višak baza tj da postoji alkaloza. Izražava se u meq/L. (1, 2, 3, 5)

PARAMETAR	REFERENTNA VRIJEDNOST
pH	7,35-7,45
pCO <sub>2</sub>	4,7-5,9 kPa ili 35-45 mm Hg
pO <sub>2</sub>	9,3-13,3 kPa ili 70-100 mm Hg
SO <sub>2</sub>	94-100%
ABE	-2 do +2
HCO <sub>3</sub> <sup>-</sup>	22-26 mmol/L
Anjonski zjap	10-14 mmol/L

Tabela 1: Parametri gasnih analiza i acido-baznog stanja i njihove referentne vrijednosti

#### 4. POREMEĆAJI ACIDOBAZNOG-STATUSA I NJIHOVA KOREKCIJA

Poremećaji acidobaznog statusa su acidoza i alkaloza, koje mogu biti metaboličkog ili respiratornog porijekla, a često su ovi poremećaji kombinovani.



Slika 4: Podjela acido-baznih poremećaja.

VRSTA POREMEĆAJA	PRIMARNI POREMEĆAJ	KOMPENZATORNI MEHANIZAM
Metabolička acidoza	$\downarrow \text{HCO}_3^-$	$\downarrow \text{pCO}_2$
Metabolička alkaloza	$\uparrow \text{HCO}_3^-$	$\uparrow \text{pCO}_2$
Respiratorna acidoza	$\uparrow \text{pCO}_2$	$\uparrow \text{HCO}_3^-$
Respiratorna alkaloza	$\downarrow \text{pCO}_2$	$\downarrow \text{HCO}_3^-$

Tabela 2: Poremećaji acido-baznog stanja i njihovi kompenzatori mehanizmi

## 4.1. METABOLIČKA ACIDOZA

**Definicija:** Metabolička acidoza nastaje kada je povećana koncentracija H<sup>+</sup> jona u ekstracelularnoj tečnosti tj snižen pH<7,35.

**Etiologija:**

- a) Povećana produkcija H<sup>+</sup> jona ili smanjeno izlučivanje: proliv, biljarne i pankreasne fistule, različite stome (enteralne i uretralne).
- b) Smanjeno lučenje H<sup>+</sup> jona: bubrežna insuficijencija-uremija.
- c) Abnormalan metabolizam: ketoacidoza (dijabetična, alkoholna, starvacijska-kod gladovanja), laktatna acidoza, trovanja (salicilati, metanol, etilen-glikol). Kod ovih poremećaja postoji tzv anjonski zjap. = [Na<sup>+</sup>] - ([Cl<sup>-</sup>] + [HCO<sub>3</sub><sup>-</sup>]) Anjonski zjap je razlika anjona i katjona u arterijskoj krvi.

Referentna vrijednost iznosi 10-14 mmol/L.

Povišene vrijednosti nalazimo kod laktatne acidoze, ketoacidoze (dijabetes i abuzus alkohola), intoksikacije.

Normalne vrijednosti anjonskog zjapa su kod gastrointestinalnih poremećaja i renalne disfunkcije.

Snižene vrijednosti su kod hipoalbuminemije.

**Patofiziologija i kompenzatori mehanizmi:** Postoji povećana koncentracija H<sup>+</sup> jona. Za njihovu neutralizaciju prvo reaguju puferi, potom reaguju sa bikarbonatima, koje bubrezi zadržavaju. Nastaje H<sub>2</sub>CO<sub>3</sub> koja disosuje na H<sub>2</sub>O i CO<sub>2</sub>, a potom se CO<sub>2</sub> eliminiše preko pluća, tj nastaje kompenzatorna hiperventilacija i posljedična respiratorna alkaloza. Sami H<sup>+</sup> joni su snažni, direktni stimulatori respiratornog centra.

**Gasne analize:** ↓pH, ↓HCO<sub>3</sub>, ↓ABE.

**Klinička slika:** Hiperventilacija, dispnea, aritmije srca, somnolencija, dezorientisanost ili čak koma, jako „kiseo“ urin.

**Liječenje:**

- Traganje za uzrokom (osnovnom bolešću) te etiološko liječenje
- Nadoknada bikarbonata prema formuli: ABEx0,3xTT/kg (obično 1/2 od navedene doze u bolusu, ostatak u kontinuiranoj infuziji)
- Rehidratacija
- Korekcija ev.elektrrolitnog disbalansa

## **4.2. METABOLIČKA ALKALOZA**

**Definicija:** Metabolička alkalozna nastaje kada je smanjena koncentracija  $H^+$  jona u ekstracelularnoj tečnosti tj povišen  $pH > 7,45$  (gubitak kiselina ili retencija baza).

**Etiologija:**

- povraćanje (gubitak HCl),
- davanje diuretika, hiperaldosteronizam (gubitak K),
- deficit K
- jatrogena-predoziranje bikarbonatima i antacidima.

**Patofiziologija i kompenzatorni mehanizmi:** Postoji smanjena koncentracija  $H^+$  jona. Prvo reaguju puferi, potom se aktivira respiratorna regulacija, tj dolazi do hipoventilacije da bi se  $CO_2$  zadržao u organizmu, koji će potom reagovati sa  $H_2O$ , nastaje  $H_2CO_3$  koja disosuje na  $H^+$  i  $HCO_3$ .  $HCO_3$  će potom biti sekretovani od strane bubrega.

**Gasne analize:**  $\uparrow pH$ ,  $\uparrow HCO_3$ ,  $\uparrow ABE$ .

**Klinička slika:** Depresija disanja, pojačan tonus muskulature, konvulzije i grčevi, somnolencija, promjena mentalnog statusa, moguća koma.

**Liječenje:**

- Traganje za uzrokom (osnovnom bolešću) te etiološko liječenje
- Davanje hipertoničnog rastvora NaCL
- Korekcija elektrolitnog disbalansa (nadoknada K i CL)

### **4.3. RESPIRATORNA ACIDOZA**

**Definicija:** Respiratorna acidoza nastaje kada je povećana koncentracija H<sup>+</sup> jona u ekstracelularnoj tečnosti tj snižen pH<7,35, a nastaje kao posljedica primarnog porasta pCO<sub>2</sub>.

**Etiologija:**

- Poremećaji respiratornog centra (povrede ili oboljenja CNS-a, dejstvo opijata, sedativa, anestetika)
- Neuromišićna oboljenja (multipla skleroza, poliomijelitis, mijastenija gravis, itd)
- Primarne bolesti pluća i pleure
- Deformacije i povrede zida grudnog koša (trauma, kifoskolioza itd).

**Patofiziologija i kompenzatori mehanizmi:** Primarno postoji porast pCO<sub>2</sub>. CO<sub>2</sub> reaguje sa H<sub>2</sub>O, nastaje H<sub>2</sub>CO<sub>3</sub> koja disosuje na H<sup>+</sup> i HCO<sub>3</sub><sup>-</sup>. Aktivira se bubrežni regulatorni mehanizam postepeno, te će nastati retencija HCO<sub>3</sub><sup>-</sup>, tj kompenzatorna metabolička alkaloza.

**Gasne analize:** ↓pH, ↑pCO<sub>2</sub>, normalni ili ↑ HCO<sub>3</sub> (normalni su u akutnoj fazi, a sa aktivacijom kompenzatornih mehanizma bubrega njihova koncentracija raste).

**Klinička slika:** Glavobolja, psihička uznemirenost, poremećaji vida, tremor, delirijum, somnolencija, inverzija sna.

**Liječenje:**

- Liječenje osnovnog poremećaja-stimulisanje disanja (oksigenoterapija, inhalacije, bronhodilatatori, NIV, ev.intubacija)
- Upotreba bikarbonata je kontraindikovana! (3,4,6)
- OPREZ sa oksigenoterapijom jer je hipoksemija jedini stimulus disanja (opasnost od depresije respiratornog centra)

#### **4.4. RESPIRATORNA ALKALOZA**

**Definicija:** Respiratorna alkalozna nastaje kada je smanjena koncentracija H<sup>+</sup> jona u ekstracelularnoj tečnosti tj povišen pH>7,45, a nastaje kao posljedica primarnog smanjenja pCO<sub>2</sub> zbog hiperventilacije.

**Etiologija:**

- Emocionalni stres, napad panike
- Trovanje salicilatima
- Na početku statusa astmaticus-a
- Oboljenja CNS-a

**Patofiziologija i kompenzatori mehanizmi:** Primarno postoji smanjenje pCO<sub>2</sub>. Zbog smanjenja sinteze H<sub>2</sub>CO<sub>3</sub>, aktivira se bubrežni regulatorni mehanizam postepeno, te će nastati sekrecija bikarbonata.

**Gasne analize:** ↑pH, ↓pCO<sub>2</sub>, ↑ABE, ↓ HCO<sub>3</sub>.


**Klinička slika:** Samo kod izražene hipokapnije. Nastaju parestezije, razdražljivost, mišićna slabost, srčane aritmije a u najtežim oblicima zbog vazokonstrikcije i smanjenog cerebralnog protoka gubitak svijesti, konvulzije, tetanički grčevi.

**Liječenje:**

- Liječenje osnovnog poremećaja
- Kod tetanije 10% Ca-glukonat

## 5.ZAKLJUČAK

- Acidobazni poremećaj se često susreće u kliničkoj praksi
- Iz razloga što se pH mora održavati u uskim granicama da bi se održala homeostaza organizma, neophodno je blagovremeno otkrivanje koje je danas brzo, lako i dostupno zahvaljujući savremenim uređajima (gasnim analizatorima) i lakom uzimanja uzorka krvi (bilo da je riječ o arteriskoj ili kapilarnoj krvi)
- Nakon verifikacije poremećaja potrebno je utvrditi o kojem je tipu poremećaja riječ i započeti odmah sa korekcijom poremećaja uz istovremeno traganje za etiologijom



## **6.LITERATURA**

1. Stanetić M,Pulmološki priručnik,Banja Luka,2002,str.98-104.
2. Sekulić S,Pluēne bolesti,Elit Medica,Beograd,2002,str.81-90.
3. Jovanović T,Milovanović A,Respiratorni sistem.fiziologija i funkcionalna procena,Naučna knjiga,beograd,2001;69-76.
4. Zimmerman J,Acid-base disorders,ACCP PulmonaryBoard Review,American college of chest physicians,2005;33-40.
5. Major-Zoričić Ž,Acido-bazni status organizma,Pneumon 1991,Vol.29;171-179.
6. Arterial blood gas analysis, available at:  
[http://www.globalrph.com/abg\\_analysis.htm](http://www.globalrph.com/abg_analysis.htm)